

SURAT PAULOS KE JEMAT

GALATIA

PENULAU BECAKAP

Surat to' rasol Paulos tules ke kebala jemat te adai de Galatia, salah sute' Propinsi Ruma te adai de Asia Met. Urang te de Galatia to' ukai sida' Yahudi. Meliya' teh sida' nyemah kebala roh-roh, uleh pas Paulos semaru blaboh madah Brita Bayek diya', adai urang te percaya' ke Isa Al Maseh. Tangan nya' adai urang te nanya' apa urang Kristen alah patoh ke Prator Tuhan Allah te datules Musa. Paulos madah nadai alah piya'. Sute' ute' te paleng penteng ngau pengidop urang Kristen nya' percaya' ke Isa Al Maseh. Ngau cara nya' ensia tau' kena' de mua Tuhan Allah. Uleh adai kebala urang te nentang pengajar Paulos. Sida' ngajar urang alah nuna' Prator Musa isa' tau' kena' de mua Tuhan Allah.

Surat Paulos to' datules ngau nulong kebala urang te udah datesat kebala pengajar te salah nya', isa' sida' bebalek patoh ke pengajar te kena'. Paulos blaboh madah ente' ya adai hak dasebot rasol Isa Al Maseh. Paulos madah Tuhan Allah te mileh ya jadi rasol, ukai ensia. Tugas semaru ya nya' madah Brita Bayek ke urang te ukai bansa Yahudi (pasal 1-2). Uдах nya' Paulos madah age' ensia pro' tau' kena' de mua Tuhan Allah ngau cara percaya' ke Tuhan Allah (pasal 3-4). De pasal pemado' kitab to' (pasal 5-6), Paulos nunyok kaseh te timol de urang Kristen nya' nema ya percaya' ke Al Maseh. Kaseh nya' mah te ngasoh urang Kristen mulah kebala utai te bayek.

Tabe'

1 Tabe' ari ku rasol Paulos. Ku jadi rasol ukai dapileh kebala ensia, aba' ukai ga' ari siko' ensia. Uleh ku dapileh uleh Isa Al Maseh aba' Allah Apai, te udah ngidop Isa ari pemat. ² Kebala menyade' seiman kita te adai aba' ku, kirem tabe' ga' ke kita' kebala jemat te adai de wilayah Galatia. ³ Ku bradua isa' Tuhan Allah Apai kita aba' Tuhan Isa Al Maseh nganya'

pemayek ati aba' mre' idop penoh damai ke kita'. ⁴Isa udah nyerah dire' mati, ngau ngelepas kita ari kebala dusa, isa' kita slamat ari jaman te jat to'. Ya mulah piya' nema nya' mah kedeka' Tuhan Allah Apai kita. ⁵Puji Tuhan Allah blaboh ari ento' datai ke jemah! Amen.

Pro' sute' mah Brita Bayek

⁶Ku ampal ke kita' deras amat nudi Tuhan Allah. Ya udah ngumai kita' isa' idop alam pemayek ati Al Maseh, uleh kita' pecaya' ke brita bayek te ke bukai ari Brita Bayek te udah kami padah ke kita'. ⁷Tuna' des nise' brita bayek te kebukai, uleh adai urang te ngaru pemiker kita' aba' brusaha ngubah Brita Bayek tentang Al Maseh. ⁸Ente' adai urang te madah brita bayek te kebukai ari Brita Bayek te udah kami padah ke kita', entah ke nya' kami kedire', entah ke nya' mlikat ari sruga, pesti mah Tuhan Allah ngukom ya! ⁹Upa te udah kami padah ke kita' meliya' teh jalai kami age' aba' kita'. Ento' ku madah age', ente' adai urang te madah ke kita' brita bayek te kebukai ari Brita Bayek te udah kita' trima', isa' mah Tuhan Allah ngukom urang nya'. ¹⁰Ari apa te ku padah, amat mah ente' ku sama skale' nadai ka' brusaha nyuroh ati ensia gaga. Uleh ku pro' ka' brusaha nyuroh ati Tuhan Allah gaga. Amat mah ente' ku nadai brusaha nyuroh urang madah ente' ku urang bayek. Ente' ku pro' ka' brusaha nyuroh ati ensia gaga, ku ukai playan Al Maseh.

Paulos nusoi kati ya jadi Rasol

¹¹Kebala menyade', ku ka' kita' tau' bada', ente' Brita Bayek te ku padah ke nya' nadai ari ensia. ¹²Ku nadai nrima' Brita Bayek nya' ari ensia, aba' nise' urang te ngajar nya' ke ku. Isa Al Maseh kedire' mah te nganya' Brita Bayek nya' ke ku. ¹³Pesti kita' udah ninga kati pengidop ku meliya', jalai ku age' nuna' agama Yahudi. Kita' tau' bada' ku nise' pemado' mrisa kebala jemat Allah, aba' brusaha ka' munas sida'. ¹⁴Alam agama Yahudi, ku jaoh lebeh bayek ari sida' Yahudi te sepantar aba' ku. Ku ma ransak nuna' kebala prator adat basa puyang jagangku. ¹⁵Uleh nema pemayek ati Tuhan Allah, Ya udah mileh ku blaboh ari ku adai alam perot inaku aba' ngumai ku jadi playan Ya. ¹⁶Ya ka' nyuroh ku bamat-amat nglala Anak Ya, isa' ku nusoi Ya nya' ke urang te ukai bansa Yahudi. Pas tangan nya' ku nadai minta' ajar urang bukai. ¹⁷Ku nadai ga' angkat ke

Yerosalem ngusong sida' te dulau ari ku jadi rasol. Uleh ku angkat ke dairah Arab, baro' ari nya' ku bebalek ke kuta Damsek. ¹⁸ Tiga taon udah nya', baro' ku angkat ke Yerosalem ngunyong Kepas. Diya' ku diyau de rumah ya plama' lima' blas ari. ¹⁹ Uleh ku nise' betemu aba' kebala rasol te kebukai, bukai ari Yakubos menyade' Tuhan Isa. ²⁰ Tuhan Allah te jadi saksi ku tau' bada' apa te ku tules ke to' kena', ku nadai bula'. ²¹ Uдах nya' ku angkat ke propinsi Siria aba' Klikia. ²² Uleh tangan nya' kebala jemat te adai de daerah Yudia bedau kala' meda' ku. ²³ Sida' pro' ninga urang madah, “Urang te dulau mrisa kami te pecaya' ke Al Maseh, ento' nyau madah Brita Bayek te udah ka' dapunas ya dulau.” ²⁴ Sida' muji Tuhan Allah nema apa te udah dapulah Tuhan Allah alam idop ku.

Kebala rasol te kebukai ngako' ente' Paulos to' rasol

2 Uдах empat blas taon, ku angkat age' ke Yerosalem aba' Barnabas, aba' Titos ku bai' ke ga'. ² Ku angkat ke Yerosalem nema nuna' apa te udah Tuhan Allah anya' ke ku. Da Yerosalem ku kedire' betemu aba' kebala pemipen jemat. Ku nyelas ke sida' Brita Bayek te ku padah ke kebala bansa te ukai bansa Yahudi. Ku ka' kami sati isa' playanan te udah ku puluh aba' te to' nadai pracuma. ³ Titos te aba' ku ukai sida' Yahudi, uleh kebala pemipen jemat Yerosalem nadai maksa ya dasunat nuna' Prator Musa, ⁴ amat mah adai kebala urang te nesak utai nya'. Sida' nya' ngamoh dire' ke klumpok kita, budi-budi ngau menyade' kita. Kebala urang nya' diyau-diyau tama' ngintop, ka' meda' kita te nyau sute' aba' Al Maseh, amat nadai kita nyau bibas ari Prator Tuhan Allah te datules Musa. Sida' ka' isa' kita bebalek age' upa ulon nuna' Prator Musa nya'. ⁵ Uleh kami sengai-ngai tunok ke sida', nema kami ka' nyaga isa' Brita Bayek te amat nya' jong adai da kita'. ⁶ Uleh kebala pemipen jemat nise' namah apa te ku padahkah. (Ku nadai iboh ke sapa sida' meliya', nema Tuhan Allah kedire' nadai nyemeh mipeh urang te dakaseh.) ⁷ Uleh sebalek sida' nya' meda' ente' ku udah dapecaya' madah Brita Bayek ke kebala urang te ukai bansa Yahudi, sama upa Petros de pecaya' madah Brita Bayek ke kebala sida' Yahudi. ⁸ Nema Tuhan Allah te mre' kuasa ke Petros jadi rasol kebala sida' Yahudi, Ya ga' te mre' kuasa ke ku jadi rasol ke kebala urang te ukai bansa Yahudi. ⁹ Yakubos, Petros, aba' Yohanes te depanang ngau

pemimpin jemat diya' sadar ente' Tuhan Allah mre' tugas kusos to' ke ku, keba' sida' nabe' ku aba' Barnabas ngau tana kami to' kawan kreja. Baro' kami aba' sida' bepekat, kami madah Brita Bayek ngau urang te ukai bansa Yahudi, aba' sida' ngau sida' Yahudi. ¹⁰ Sida' pro' minta', isa' kami ingat manto' kebala urang te misken. Aba' utai nya' lama' udah ku puluh ari meliya'.

Paulos ngerara Petros

¹¹ Pas Petros bekunyong ke Antiokia, ku ngerara ya nema te dapulah ya nya' salah. ¹² Sebedau kebala urang te dautos Yakubos datai kiya', Petros gah dudok makai aba' sida' te ukai Yahudi, uleh nyau kebala urang te dautos Yakubos datai kiya', ya ngai age' dudok aba' sida', nema ya takot ke kebala urang te ka' isa' uga' urang desunat. ¹³ Kebala sida' Yahudi te kebukai, te udah pecaya', sige' nadai jujor upa Petros, nema sida' nadai mulah nuna' pengajar sida', nya' nyuroh Barnabas sige' mulah piya'. ¹⁴ Pas ku meda' tingkah sida' nadai sesuai aba' pengajar te kena' alam Brita Bayek, ku ngerara Petros de mua sida', "Ente' meh sida' Yahudi, udah idop upa urang te ukai Yahudi, ngapa meh mukong kebala urang te ukai Yahudi idop nuna' cara Yahudi?"

Sida' Yahudi aba' te ukai Yahudi slamat nema pecaya' ke Isa Al Maseh

¹⁵ Kami to' adai ari bansa Yahudi, nadai ari bansa bukai te deangap dusa. ¹⁶ Kita tau' bada' datai ke siko' mah nise' urang te kena' demua Tuhan Allah tegal nuna' Prator Musa, uleh pro' tegal pecaya' ke Isa Al Maseh. Keba' nya' mah ga' te nyuroh kami pecaya' ke Isa Al Maseh, isa' kami tau' kena' demua Tuhan Allah. Ku madah piya' nema datai ke siko' mah nise' urang te tau' kena' de mua Tuhan Allah, tegal nuna' Prator Musa. ¹⁷ Kami pecaya' ke Isa Al Maseh isa' kami tau' kena' demua Tuhan Allah. Uleh adai urang te nyalah pengajar kami, sida' madah, "Ente' kita' pro' pecaya' ke Isa Al Maseh uleh nadai tunok ke Prator Musa, kita' dusa, sama upa urang te ukai ari bansa Yahudi. Kita' dusa nema kita' pro' pecaya' ke Isa Al Maseh." Uleh apa te depadah sida' nya' salah! ¹⁸ Nema ente' ku niri age' Prator Musa te udah ku ruboh, ku jadi urang te ngelangar Prator nya'. ¹⁹ Jalai ku brusaha nuna' Prator Musa, ku tau' bada' ku nadai talah aba' pesti ku mati alam dusa. Keba' ku bado' brusaha nuna' uga' Prator

nya', isa' ku tau' idop nuna' kedeka' Tuhan Allah. Ku udah desaleb aba' Al Maseh. ²⁰Ento' ukai age' ku te idop, uleh Al Maseh te idop alam ku. Aba' idop te ku idop ke ento', nya' idop tegal pecaya' ke Anak Tuhan Allah te ngaseh ku aba' te udah mati ngau ku. ²¹Ku nadai nulak pemayek ati Tuhan Allah ke ensia. Nema ente' urang tau' kena' demua Tuhan Allah tegal patoh ke Prator Musa, nise' reti pematia Al Maseh.

Urang pecaya' jadi urang te kena' tegal iman

3 Eh kebala sida' Galatia! Ngapa kita' lampar budu? Ngapa bah kita' mudah de tipu? Ku udah jelas ngajar ke kita' tentang pematia Isa Al Maseh de kayu saleb. ²Sawot kah te ku tanya' ke to', kita' nrima' Roh Kudus tegal nuna' Prator Tuhan Allah te datules Musa, skale' ke tegal kita' pecaya' ke Brita Bayek te kita' tinga? ³Ngapa bah kita' lampar budu! Kita' udah blaboh idop baru depimpen Roh Kudus, uleh ngapa ento' kita' miker kita' talah egemansang idop baru nya' sampai temo' ngau usaha kita' kedire'? ⁴Ku sama skale' nadai pecaya' ente' pemedeh te udah kita' asa ke nya' nyau nise' guna! ⁵Jadi kati, Tuhan Allah mre' Roh Kudus ke kita' aba' mulah tana te nyelah tegal kita' nuna' Prator Musa, skale' ke tegal kita' pecaya' Brita Bayek te kita' tinga?

⁶Nya' sama upa te datules alam Kitab Suci tentang Abraham, “Abraham pecaya' ke Tuhan Allah, aba' tegal ya pecaya', ya tau' kena' demua Tuhan Allah.”* ⁷Keba' kita' alah tau' bada' urang te bamat-amat pureh Abraham nya' urang te pecaya' ke Tuhan Allah. ⁸Aba' ari meliya' Kitab Suci udah madah Tuhan Allah ka' ngasoh urang te ukai sida' Yahudi tau' kena' demua Ya nema sida' pecaya' ke Ya. Meliya' teh Brita Bayek to' udah depadah ke Abraham upa pito', “Ari meh Ku ka' mre' berkat ke uga' bansa.”* ⁹Abraham pecaya' ke Tuhan Allah keba' ya dabre' berkat. Upa piya' ga' ngenap urang te pecaya', ka' dabre' berkat sama aba' Abraham. ¹⁰Uleh uga' urang te begantong ke Prator Musa, idop de baroh Kutok. Nema alam Kitab Suci datules, “Tekutok uga' urang te nadai setia mulah uga' kebala utai te datules alam Prator Musa.”* ¹¹Jadi jelas, datai ke siko' mah nise' urang te tau' kena' da mua Tuhan Allah, tegal patoh ke Prator Musa, nema Kitab Suci madah, “Urang te kena' tegal pecaya' ke Tuhan Allah ka' idop.”* ¹²Dasar Prator Musa ukai pecaya' ke Tuhan Allah, uleh

* 3:6 Kej. 15:6 * 3:8 Kej. 12:3 * 3:10 Ul. 27:26 * 3:11 Hab. 2:4

apa te dapulah. Upa te datules alam Kitab Suci, “Urang te patoh ke Prator Musa, ka' idop tegal Prator nya'.”* ¹³ Al Maseh udah nebos kita ari kutok Prator Musa ngau cara Ya kedire' dekutok nganti kita. Nema adai datules alam Kitab Suci, “Tekutok urang te degantong de tiyang kayu.”* ¹⁴ Isa Al Maseh mulah piya', isa' ari Ya berkat te udah dedanyi Tuhan Allah ke Abraham dabre' ga' ke kebala bansa te ukai Yahudi. Ngau cara nya', kita te percaya' ke Tuhan Allah tau' nrima' Roh Kudus te udah dedanyi Ya.

Prator Musa skale' ke danyi Tuhan Allah

¹⁵ Kebala menyade', ku ka' ngau sute' cuntoh idop ari-ari. Empama teh adai dua belah pihak udah bedanyi aba' danyi nya' udah desah, nise' urang te tau' ngemalang aba' namah apa te udah dapekat. ¹⁶ Tuhan Allah bedanyi ke Abraham aba' ke siko' pureh ya. Alam Kitab Suci nise' datules “ngau kebala pureh ya,” nya' breti nadai ngau urang mayoh, uleh datules “ke siko' pureh meh,”* nya' breti ke siko' urang ja', nya' mah Al Maseh. ¹⁷ Maksud ku: Danyi Tuhan Allah udah dapulah aba' lebeh dulau sah. Prator Musa, te baro' dapulah empat ratos tiga puloh taon udah nya', nitau' ngemalang danyi te udah sah aba' nitau' ngapos danyi te dabre' Tuhan Allah. ¹⁸ Nema ente' berkat te dabre' Tuhan Allah tegantong ke urang patoh ke Prator Musa, nya' nadai age' tegantong ke danyi Ya. Uleh justru Tuhan Allah udah bedanyi ke Abraham, tegal pemaye' ati Tuhan Allah, Ya mre' berkat nya' ke Abraham.

¹⁹ Ente' piya' engkapa' Prator Musa? Prator nya' dabre' ngau nganya' kebala penyalah te dapulah ensia. Prator nya' pro' beguna datai ke senta penatai siko' pureh Abraham te depadah alam danyi Tuhan Allah ke Abraham. Prator Musa depadah kebala mlikat ke Musa, baro' Musa madah ke urang te daempu Tuhan Allah. ²⁰ Urang te jadi penengah nadai pro' ngewakel siko' urang, uleh Tuhan Allah kedire' mah te bedanyi ke Abraham. ²¹ Ente' piya' Prator Musa belawan aba' danyi Tuhan Allah? Sama skale' nadai! Prator Musa nitau' mre' idop baru ke ensia. Ente' utai nya' tau', breti ensia tau' kena' de mua Tuhan Allah, nema sida' patoh ke Prator nya'. ²² Uleh Kitab Suci madah uga' urang idop de baroh kuasa dusa, isa' tegal percaya' ke Isa Al Maseh danyi nya' dabre' ke sida' te percaya'. ²³ Sebedau senta urang tau' percaya' ke Al Maseh, Prator Musa ngurong urang upa

urang te da penyara. Utai nya' tejadi datai ke senta Tuhan Allah nganya' cara urang pecaya' ke Al Maseh. ²⁴Prator Musa nya' ngator kita sampai Al Maseh datai, isa' kita tau' deangap kena' demua Tuhan Allah nema kita pecaya' ke Al Maseh. ²⁵Ento', nema nyau senta ensia tau' pecaya' ke Al Maseh, keba' kita nadai age' dator uleh Prator Musa.

²⁶Kita' jadi anak Tuhan Allah nema kita' pecaya' ke Isa Al Maseh aba' sute' aba' Ya. ²⁷Uga' kita' te udah de pane' ngau kuasa nama Al Maseh, udah sute' aba' Al Maseh aba' nuna' gaya idop Ya. ²⁸To' breti nise' age' bida sida' Yahudi aba' urang te ukai Yahudi, nise' age' bida antara urang te jadi ulon aba' urang te nadai jadi ulon, nise' age' bida te laki aba' te ino', nema uga' kita' udah sute' alam Isa Al Maseh. ²⁹Nema kita' to' empu Al Maseh, keba' kita' pureh Abraham ga' aba' adai hak nrima' berkat te udah dedanyi Tuhan Allah.

Nise' age' ulon

4 Maksud te ku padah ke to': Slama' miyak age' engka' met, amat ya lah te ngewaris empu apai inai, ya nise' bida aba' ulon. ²Nema pewares nya' age' biyak, ya alah patoh ke urang te ngintu ya aba' urang te nguros apa te daempu ya, datai ke senta te udah deatoh apai ya. ³Upa piya' ga' kita. Meliya' teh, kita age' upa miyak te bedau nyarok te dakedeka' Tuhan Allah. Tengan nya', kita jadi ulon kebala roh te jat te bekuasa da dunia to'. ⁴Uleh da senta te pas, Tuhan Allah ngutos Anak Ya ke dunia. Miyak nya' adai ari siko' ino' aba' Ya idop de baroh Prator Musa. ⁵Tuhan Allah ngutos Anak Ya nya', ngau ngelepas kita ari Prator Musa, isa' kita tau' datrima' jadi anak Tuhan Allah. ⁶Nema kita' udah jadi anak Tuhan Allah, keba' Tuhan Allah udah ngutos Roh Anak Ya ke ati kita. Roh Kudus nya' mah te nyuroh kita ngumai, "O, Abba, o, Apai!" ⁷Kita' ukai age' ulon, kita' nyau jadi anak. Aba' nema kita' nyau jadi anak Tuhan Allah, kita' adai hak ngewares uga' te udah dedanyi Ya ke kebala anak Ya.

⁸Meliya' teh, jalai kita' nadai nglala Tuhan Allah, kita' jadi ulon kebala allah te kebukai, te ukai Tuhan Allah. ⁹Uleh ento', kita' nyau nglala Tuhan Allah, te lebeh tepat Tuhan Allah nglala kita'. Ngapa kita' ka' bebalek age' ngelayan kebala kuasa dunia to', te lemah aba' nise' guna? Ngapa kita' ka' jadi ulon kebala kuasa nya' age'? ¹⁰⁻¹¹Ku saban ke apa te udah ku kreja

ke kita' slama' to' nyau nise' age' reti, nema kita' patoh ke adat basa sida' Yahudi. Kita' ngeraya kebala ari besai Yahudi, kebala bulan, kebala rama, aba' kebala taon te deatoh sida'.

Paulos saban ke kebala urang de Galatia

¹² Kebala menyade', ku minta' isa' kita' upa ku, nema ku sige' udah upa kita'. Mliya' teh datai ke sute' mah nise' penyalah kita' ke ku. ¹³ Pesti kita' ingat semaru ku madah Brita Bayek ke kita', tangan nya' ku pedeh. ¹⁴ Amat mah penyaket ku nya' ngripot kita', kita' nadai mejai' ku aba' nadai ngai ke ku. Uleh kita' empala nrima' ku upa nrima' mlikat ari Tuhan Allah aba' sama upa nrima' Isa Al Maseh kedire'. ¹⁵ Kita' lampar gaga tangan nya', uleh ento', dini pengaga kita' te nya'? Ku tau' bada' tangan nya' kita' ka' mre' apa ja' ke ku, ngerueng mata kita' kedire' kira tau' pon kita' pulah ke ku. ¹⁶ Uleh ento' nema ku madah te pengamat ke kita', apa kita' ngangap ku munsoh kita'? ¹⁷ Kebala urang te nesat nya' ma ransak ngiga' kita', uleh maksot sida' nadai bayek. Sida' bayah ka' ngenyawoh kita' ari kami, isa' kita' ransak nrudi sida'. ¹⁸ Ku gaga ente' kita' ransak, uleh kita' alah slareh ransak ngau kebala utai te bayek, aba' nang pro' tangan ku paba' kita'. ¹⁹ Ku kaseh ke kita' upa anak ku kedire'. Ku pedeh uleh gaya kita' upa urang ino' pedeh tangan beranak, datai ke kebala urang tau' meda' Al Maseh alam idop kita'. ²⁰ Ku gawok amat adai da tengah kita' tangan to', isa' tau' male' kati cara ku becakap ka kita', nema ku nise' akal age' ngadap kita'.

Hagar aba' Sara jadi cuntoh dua danyi Tuhan Allah

²¹ Padah ke ku, o kita' te ka' patoh ke Prator Musa, nyarok nadai kita' apa te datules alam Prator Musa? ²² Alam Kitab Suci adai datules ente' Abraham empu dua iko' anak laki. Siko' adai ari ino' te jadi ulon, te siko' age', adai ari ino' te ukai ulon. ²³ Anak te adai ari ino' te jadi ulon nya' adai ngau peneka' ensia. Uleh anak te adai ari ino' te ukai ulon, nya' adai nema nemo' danyi Tuhan Allah. ²⁴ Dua iko' ino' nya' kebarat dua danyi Tuhan Allah aba' urang te daempu Ya. Ino' te jadi ulon nya' Hagar. Ya kebarat danyi semaru Tuhan Allah de buket Sinai. Kebala anak ya blaboh ari adai jadi ulon te patoh ke Prator Musa. ²⁵ Hagar to' kebarat Buket Sinai de tanah Arab, aba' ya desama' ke kuta Yerusalem te ento', nema ya aba'

kebala anak ya jadi ulon. ²⁶ Uleh Sara bini Abraham to', ino' te ukai ulon. Ya kebarat ke kuta Yerosalem ari Tuhan Allah, aba' ya nya' inai kita nema kita udah bibas ari Prator Musa. ²⁷ Nema adai datules alam Kitab Suci,

“Crigah gaga ke de' o ino' te manol,

te nadai kala' ngasa beranak!

Menanyi ke de' ngau go' te sareng,

dek te nadai kala' ngasa pemedeh beranak!

Nema ino' te dedudi laki ka' empu mayoh anak

ari ino' te idop aba' laki.”*

²⁸ Kebala menyade! Kita' kedire' mah kebala anak Tuhan Allah te adai nema danyi Tuhan Allah, sama upa Isak. ²⁹ Meliya' teh, Ismael anak Abraham te deadai Hagar nuna' peneka' ensia, mrisa Isak anak te adai nuna' peneka' Roh Kudus. Upa piya' mah ga' ento'. ³⁰ Uleh apa te depadah alam Kitab Suci? “Tesar kah ino' te jadi ulon aba' anak ya nema anak ya nitau' boleh wares ari apai ya. Uleh anak ari ino' te ukai ulon nya' te nrima' uga' wares apai ya.”* ³¹ Keba' nya' kebala menyade', kita to' bukai kebala anak ino te jadi ulon, uleh kebala anak ino' te ukai ulon.

Kita udah dabibas Al Maseh

5 Kita ento' udah bibas, nema Al Maseh te udah nyuroh kita bibas! Keba' nya' diri tegoh aba' nang ka' jadi ulon age'. ² Dinga kah! Ku Paulos, madah ke kita': Ente' kita' ka' dasunat, nya' breti apa te dapulah Al Maseh nise' guna ke kita'. ³ Skale' age' ku ngingat kita', ngenap urang te ka' dasunat isa' tau' kena' de mua Tuhan Allah, ya alah patoh ke uga' Prator Tuhan Allah te datules Musa. ⁴ Kita' te brusaha isa' tau' kena' demua Tuhan Allah ngau cara patoh ke Prator Musa, nadai sute' age' aba' Al Maseh. Nya' breti kita' idop de luar pemayek ati Tuhan Allah. ⁵ Uleh tegal Roh Kudus te nulong kita aba' tegal kita pecaya' ke Al Maseh, Tuhan Allah ka' nrima' kita jadi urang te kena' demua Ya. Aba' nya' mah te kita agam kah. ⁶ Nema ente' kita sute' aba' Isa Al Maseh, nise' age' masalah urang te dasunat aba' urang te nadai dasunat. Te penteng kita alah pecaya' ke Al Maseh, aba' nya' peda' ente' kita kaseh ke pangan bukai.

⁷ Meliya' teh kita' sruni nuna' Brita Bayek ari Tuhan Allah. Ento' ngapa kita' nadai nuna' pengajar te kena'? Ngapa bah kita' mudah amat datipu?

* 4:27 Yes. 54:1 * 4:30 Kej. 21:10

⁸Pesti te mulah nya' ukai Tuhan Allah te udah ngumai kita! ⁹Keba' nya' ati-ati ke kita', pengajar sida' te nesat nya' upa ragi, “Siket ragi tau' nyuroh uga' tepong ngremai.” ¹⁰Ku yaken kita' ka' nuna' pengajar ku nema kita sute' aba' Tuhan. Uleh sapa ja' urang te ngaru pemiker kita' pesti deukom Tuhan Allah! ¹¹Kebala menyade' ku, ku nadai ngajar ente' urang alah dasunat. Ente' ku age' ngajar urang alah dasunat, ngapa ku age' daprisa? Ente' ku age' ngajar piya', pengajar ku tentang Al Maseh mati de saleb nadai jadi masalah. ¹²Ku arap kebala urang te ngacau pemiker kita', lebeh bayek sida' merire' dire'!

¹³Kebala menyade', kita' udah de dakumai Allah jadi urang te bibas ari Prator Musa. Uleh amat piya', nang bibas nya' kita' ngau muas peneka' te jat. Sebalek kita' alah nglayan pangan bukai ngau kaseh. ¹⁴Nema adai Printah te madah pito', “Kaseh kah pangan bukai upa ngaseh dire' kedire’.”* Printah to' jadi dasar uga' Prator te datules Musa. ¹⁵Uleh ente' kita' baketop aba' makai sama dire' sengabot upa jelu te ganas, ati-ati mah, kita' ka' sama ancor.

Peneka' Roh Kudus aba' peneka' ensia te jat

¹⁶Maksod ku pito': Kita' alah idop depimpen Roh Kudus, isa' kita' nadai nuna' peneka' ensia te jat, te adai alam dire' kita'. ¹⁷Nema peneka' ensia te jat belawan aba' peneka' Roh Kudus aba' peneka' Roh Kudus belawan aba' peneka' ensia te jat te adai alam idop kita'. Nema dua ute' utai to' betentang, nya' nyuroh kita' nadai mulah utai te bayek te kita' kedeka'. ¹⁸Uleh ente' Roh Kudus mimpen idop kita', kita' nadai depaksa nuna' Prator Musa.

¹⁹Uga' pemulah te nuna' peneka' ensia te jat nya' udah jelas: bara', mulah te nadai senunoh, kanyi, ²⁰nyemah berhala, ngau ilmu siher, bemunsoh, blaya', ngemuru, iri ati, mudah ranseng, menteng dire' kedire', mecah-belah, mulah klumpok kedire', ²¹ripot ke pangan, pemabok, gaga brami te nadai bayek aba' age' mayoh te bukai. Skale' age' ku ngingat kita', upa te udah kupadah dulau, ente' urang mulah te piya' sengabot ya nitau' nrima' apa te udah Tuhan Allah ageh ke umat Ya de Pemrintah Tuhan Allah.

* 5:14 Im. 19:18

²² Uleh buah Roh Kudus nya' kaseh, ati gaga, idop penoh damai, sabar, iboh ke pangan, bayek ati, setia, ²³ renah ati, aba' talah ngetat dire'. Nise' ukom agama te ngerot uga' nya'. ²⁴ Ngenap urang te daempu Isa Al Maseh udah nyaleb peneka' sida' te dusa. Sida' udah nudi kebala peneka' sida' te jat te ka' sida' puluh. ²⁵ Kita udah idop baru uleh Roh Kudus. Keba' nya' kita alah bejalai dapimpen Roh Kudus. ²⁶ Keba' nya', nang ngepah ngemah dire', nang blaya' aba' pangan, aba' nang iri ati ke pangan bukai.

Manto' sama dire'

6 Kebala menyade' ente' adai daentara kita' te mulah penyalah, kita' te idop nuna' Roh Kudus, alah mimpem urang nya' bebalek ke jalai te kena'. Uleh kita' alah mulah nya' ngau cara alos, aba' nyaga dire' nang sampai kita' kedire' tebai'-bai' laboh ke alam dusa ga'. ² Kita' alah manto' sama dire' te ngasa pemedeh, ngau cara nya' kita' patoh ke ukom Al Maseh. ³ Ente' siko' urang ngangap dire' penteng, bata' ya sama skale' nadai penteng, ya ngemula' dire' kedire'. ⁴ Ngenap urang alah mresa dire', apa te dapulah ya bayek, skale' ke nadai. Ente' bayek ya tau' ngepah ngemah dire' ke kebala utai nya'. Uleh nadai ya alah nyema' nya' ngau apa te dapulah urang bukai. ⁵ Nema ngenap urang betangong jawab kedire' ke apa te ya puluh.

⁶ Urang te deajar Pemadah Tuhan Allah, alah magi sebagi ari apa te adai de ya ke urang te ngajar ya.

⁷ Nang ngemula' dire'! Tuhan Allah nadai tau' degurau. Apa te detamak urang, nya' mah te daketau. ⁸ Keba' ente' urang namak nuna' peneka' ensia ya te jat, ya ka' ngetau pematari peneka' te jat. Uleh sapa te namak alam Roh Kudus, ya ka' ngetau idop sengabot ari Roh nya'. ⁹ Nang kita lejo' mulah te bayek, nema jemah kita ka' ngetau asel, ente' kita nadai bado' mulah te bayek. ¹⁰ Keba' nya' panyong tau' mulah te bayek, boh kita mulah te bayek ke uga' urang, te paleng dulau ke kebala menyade' kita te sama pecaya' ke Isa Al Maseh.

Pesau aba' tabe' Paulos da pemado' surat ya

¹¹ *Peda' kah, kati pemesai kebala urop te ku tules ke kita' ngau jari ku kedire'.*

¹²Kebala sida' nya' ka' mukong kita' dasunat, isa' sida' dapeda' bayek. Sida' takot daprisa ente' sida' ngajar, urang pro' tau' kena' de mua Tuhan Allah nema pecaya' ke Isa Al Maseh te mati de kayu saleb. ¹³Amat mah sida' dasunat, uleh sida' nadai patoh ke uga' Prator Tuhan Allah te datules Musa. Uleh sida' ka' kita' dasunat, isa' sida' tau' ngepah ngemah dire' ente' kita' patoh ke pengajar sida'. ¹⁴Uleh ku pro' ka' ngepah ngemah pematu Tuhan Isa Al Maseh de kayu saleb. Nema tegal pematu Ya, apa te deangap kebala urang dunia to' brega, ku angap nise' reti. Aba' ku tau' depadah upa urang te udah mati de pemedah' dunia. ¹⁵Dasunat aba' nadai, nya' nadai penteng. Te ma penteng idop alam Al Maseh. ¹⁶Ku bradua ke uga' urang te idop nuna' pengajar to', ke uga' urang te daempu Tuhan Allah. Engkrema' Tuhan Allah nganya' pemayek ati Ya ke sida' aba' nyuroh idop damai.

¹⁷Blaboh ari ento' ku minta' ke kita' nang medeh ku age' ngau kebala utai to'. Nema de tuboh ku adai abi kebala bakal, nya' bukti ente' ku empu Isa.

¹⁸Kebala menyade' ku, ku bradua isa' Tuhan kita Isa Al Maseh nganya' pemayek ati Ya ke kita' sengabot. Amen.